

- 1 ignwan a-issmalan timuḡra n-rbbi,
tattuyt ar-ttbraḥ s-iskkirn-ns.
- 2 azal ar-yakka laḥbar i-uzal,
d-iyḍ ar-tn-imala i-iyḍ ḡ-tgira-ns.
- 3 ur-nsfld i-iwaliwn ula tajmmaḡt,
- 4 imma timitar-nsn kkant kraygatt mani,
truḥ-twaḡra-nsn ttmi n-wakal.

iskr rbbi ḡ-ignna tazdḡt i-tafukt.

- 5 zikk a-tnkkr zund asli zḡ-tgm̄mi,
s-lfrḥ a-s-a-ttazzal zund yan itjhhdn.
- 6 hati ar-di-taqlay zḡ-ttmi n-ignwan,
tkl ard-di-tlulli s-ttmi yaḍni.
ur-illi ma-ra-irgs zḡ-trḡi-ns iḥrran.

- 7 hati ifulki-wawal n-rbbi,
ar-bdda-issdus ulawn-nnḡ.
hati zgan-warratn n-rbbi,
gn lfhmt iggutn i-ibujadiyn.
- 8 hati ḡ^wzannt-tnbaḍin n-rbbi,
ar-bdda-ssfraḥnt tasa-nnḡ.
hati šwant luṣiyat n-rbbi,
ar-bdda-rzḡmnt alln-nnḡ.
- 9 hati hiyyant-tksaḍ n-rbbi,
rad-bdda-yili ma-t-itiksāḍn.
hati s-lḥqq a-s-a-ithkam rbbi,
ar-aḡ-yakka mad-aḡ-igan.

- 10 iēzzu-wawal-nnk ugg^war n-uwrḡ,
iēzzu f-kigan n-uwrḡ iṣfan.
imim f-tammnt ula timqqa n-imšḍ.
- 11 ar-ithdu willi-k-itḡbadn.
d-wanna srs iskarn, lḥir a-rad-as-yili.

- 12 ur-nssin lēib lli-intln ḡ-uwl-nnḡ.
ssḡus-iyi a-rbbi zḡ-ma-gigi-irgsn.
- 13 tḥṣart-iyi a-ur-ffuḡḡ zḡ-wawal-nnk,
ula ḥkamn gigi gar iskkirn.
ḡmkad a-s-rad-gḡ yan dar ul iṣfan,
ula rad-jluḡ zḡ-uḡaras-nnk.

- 14 rar iwaliwn n-ils-inu
d-iswingimn n-uwl-inu
a-k-rḍun a-sidi rbbi,
aṣku kiyin a-igan ajarif l-laman
tgt anjjam-inu.